



# Ta ko Kijen Ek?




Elōñlōk jān 1,000 kain ek ko ilo Majeļ.

Ak ta kijeer?

Ekwe, ekajjojo wāween kijeer im kajjojo kilen  
aer mōña.



Elōñ jet ek rekilep im jet reddik rej jīmōr  
mōñā meninmour im menin eddek jiddik ko me  
rej peto-petak ilojet.



Ek jiddik kein me rejatōltōl rej  
bōk kijeer jān men jidik ko ilo lojet reddik.


**Akwōlā** ej walañi loñiin im aō. Aolep men ko reddik rej peto-petak rej deļoņe loñiin.




Dān wōt ej diwōjļok, ak men ko reddik kijen wōt rej po iloñiin



**Boraan** im jet ek ko me relukkuun lap, rej  
walañi loñier im orañlok men ko kijeer rej  
peto-petak ibuloñ lojet.



Bar jet ek, ekoba **badet** im **pājrōk** im ek ko  
jet, rej ļoje kōlla.



**Kūbu** ej pād iaejet.



Kōn an aetok atlaḷ in jān atlōñ in epidodo an  
bōk kijen jān men ko rej epepe ioon dān.

Jet ek relukkuun kile kijeer.

**Likōb** eo ej ajāl wōt jān men ko iumwin  
dekā enwōt baru, libbūñōj im men ko āierlōkwōt.




Kōn menin, **likōb** in ej okdekā.

**Jepooj** ej nomnom kijen libbūñōj im ek ko me  
reddik im men ko āierlōkwōt.




**Mōtal** im jo, im ek ko āierlōkwōt, rej bōk  
kijeer ilo aer ñar ilo liṃ.




**Mōtal** ej mōñā ñe eraan, ak jo ej mōñā wōt ilo  
boñ.

**lāibukwi** ej kōbaru im kōkalibban ilo liṃ.



Ej ettoḷ kijen bwe mejān epād ioon im loṇiin  
epād iumwin.

**Jippule in lim** im libbūñōj ej kōb rōñ im kappok  
kijeero menin mour ko reddik jān buļōn lim.



ljo kuṇaan **jippule** ej emmejrake bwe  
libbūñōj eo eṇ jab jorrāān.




**Kije jourur\*** ej matmat im oñoñ kab men ko  
āierļokwōt.




\*barāinwōt ņaetan wōllaañ ak pāep.


Loñiin **pelej** elukkuun aetok. Ej kōbaru kijen baru jiddik, libbūñōj im men ko jet me rej mour ilowaan wōd lā ko.




Lõnñiin im mājēn **liele** eaetok kōtaer im epen kilin. Kōn menin ejelā kadelõñ lõñiin ikōtaan mādē ko an lõr eo im rupe im kañ kobban.



**Dibab** in ej barāinwōt kadeļoñ loñiin ikōtaan  
made ko ilo ʎor eo im kañ mōttan eo epidodo  
ilowaan ʎor eo.




Lõñiin **Jabōnke**\* ekanooj kajoor im ej rupe  
aolep kain aorak, libbukwe im men ko āierlōkwōt.  
Ej rupi im kañ kobaer.



\* mōjañūr ilo kajin Ratak


Kijen **po** in, ñe edik, ej mōna libbūñōj jiddik ko  
rej peto-petak ilo dān.



Ak, ñe erūttoḷok em ekajoorḷok ñiin, ej mōñā  
libbukwe im men ko reppen.




Elōñ ek rej mōñā wōd āinwōt **luwab**, rej tumi  
aboñin wōd lā ko.



Ak **ejudej** ej mōñā mōttan eo me emour ilo wōd.


**Audaṃ, mao, kilkil** im ek ko āierlōkwōt, rej  
kōjerbal ñi ko rekanooj in kajoor in ñarij wōd eo.



Rej kañ ṃōttan wōd eo emour, ak ekkā wōt  
aer ṃōña kūbeen aḷ ej pād ilowaan wōd.




Elõñ ek rej mõñā kūbeen aļ. Elukkuun enņo  
ippān **jibbaļañ**. Ej ñar im ninnin kijen jān kilin  
dekā im parijet.




**Baru** in **kubañ** im **ṃole\*** rej ṃōñā  
kūbeen aḷ ioon wōd ko.

Ilo aer kōṃṃan āindein, rej kōjparok wōd  
ko jān jorrāan, kōnke eban eṃṃan an wōd ko  
mour ñe menōknōk enaaj pinej meram in aḷ.



\*ellōk ilo kajin Rālik


Ūrōrmej\* in ej ekkat juon wōt kain kūbween  
aḷ im ej jetṇaaki katkan.



Bar juon āt ej **bañij**.




Aolep armej rejelā ke ek ko ekkā aer mōñā  
ek. Ak āinjuon kilen aer kōmōñā.




**Dap** ej kōmōñā ilo boñ . Ej kāātet bwiin men  
ko ej kañi.


**Bwebwe** elukkuun mōkaj. E iium an kappok  
kijen.



Ak **no** e ej kōppao kijen.




**Kidiej** ej orañłok ek ko kōnke ekilep bōrān.  
Emarōn barāinwōt orañłok baru ko, or ko, im  
wōn ko.






**Pako** im **ikuut** rej ippān doon. **Ikuut** ej mōñā mōttan eo ñe **pako** ej mōñā.



Ijellōkin an mōñā ek, pako ej bar mōñā jabdewōt men, ilojet āinwōt kuwat, juuj ko remor, dila im men ko āierlōkwōt




Ewōr bar juon kain ek jidikdik, ekkā an  
kepaak ek ko rekkilep me rej kañi ek ko jet.  
Juon iaar ej **alle**.



Kijen **alle** ej mōñā men ko ej karreoik jān kilin  
ek ko jet. Ejjab kōmman jabdewōt jorrān ñan  
ek ko jet, im ek ko jet rejjab kōmman jabdewōt  
jorrān ñan e.

Ak ewōr bar juon ek jidikdik me enañin āinļok  
wōt **alle**.




Ak etao ek in.

Ej kepaak ek ko jet āinwōt enaaj karreoik im  
jipaņ er, ak ilo mool ej kiji im kōkkure er.

Erkein ej jet iaan wāween an ek in ẖajel, ko kapok kijeer.

Łōmṇak ṇōk, kōn wāween an ek ko kwojelā kaki bōk kijeer im kilen aer pukoti men ko kijeer.



## Laajrak in Ek Ko



akwōlā.....	6
boraan.....	7
badet.....	8
pāirōk.....	8
kūbū.....	9
likōb.....	10
jepooj .....	11
mōtal .....	12
āibukwi.....	13
ettōl.....	13
jipule.....	14
kijen jourur .....	15
wōllaan .....	15
pālep .....	15
pelej .....	16
liele.....	17
rūbōb ak dibab.....	18
lor.....	18
jabōnke.....	19
mōjañūr.....	19